

La cultura é de duc: tol pèrt ence tu!

Dai 20 ai 25 de oril ence l Museo Ladin de Fascia tol pèrt a la Setemèna de la cultura. Te la sala Heilmann esposizion di lurieres del projet “Generazions visavi”

Ence l Museo Ladin de Fascia tol pèrt a la XI Setemèna Nazionèla de la Cultura metuda a jir dal Minister per i Bens e la Ativitèdes Culturèles dai 20 ai 25 de oril 2009. L slogan de chest an: “La cultura é de duc: tol pèrt ence tu!” vel sottrissèr la volontà de tor ite a na vida ativa i sentadins e la istituzions locales te la ativitèdes del Museo. L Museo Ladin de Fascia donca vegnirà orì debant da lunesc 20 enschin sàbeda 25 de oril da les 3 a les 7 domesdì, per ge dèr l met, a duc chi che vel, de se arvejinèr a la cultura e a la traditions ladines de la Val de Fascia.

Te chesta ocajon vegnirà metù a jir la mostra “Generazions visavi”, retrac realisé dai studenc de la Scola d’èrt “G. Soraperra” de Poza.

Estrapede via per la setemèna i Servijes Educatives metarà a jir vijites vidèdes te Museo avertes a duc e sobito dò sarà trei scontrèdes che trata de tematches desferentes ma zis enteressantes: l’astrofotografia, la cultura musicala ladina e en antepurma l filmat documentarie su Tita Piaz.

L program de la setemèna de la cultura perveit:

en lunesc ai 20 de oril da les 16.30 l’inaugurazion de la mostra “Generazions visavi” per endrez de la Scola d’Èrt de Poza (che restarà averta enschin ai 30 de oril 2009) con l’intervent musical de la scola de musega “Il Pentagramma” de Fascia e Fiem;

en mèrtesc ai 21 da les 17.30 “Mizàcoles de lum”, scontrèda con l’astrofotografia en ocajon de l’an de l’astronomia con Claudio Balella;

en mèrcol ai 22 da les 17.30 “Dal Gartner a Encresciadum” tradizion e inovazion te la cultura musicala ladina con Renato Morelli;

en jebia ai 23 da les 17.30 “Chel diaol de Pavarin” prejentazion del film documentarie sun Tita Piaz de la Montibeller Film Trent.

Ogne dì da les 16.30 vegn endrezà la vijita vidèda debant te la sales espositives; estra apede, via per la setemèna, tel bookshop del Museo, vegnirà sport la publicazions de l’Istitut Cultural Ladin con n rebas del 15% sul priesc de soracuerta.

Generazions visavi

De gra al projet RSArt doi mondi e doi generazions desvalives i à podù se scontrèr: la Scola d’Èrt

G. Soraperra de Poza e la Cèsa de Paussa per Jent de Età de Vich. L percors l’é stat maraveous e ne à dat l met de cognoscer na realtà desvaliva e scialdi n muie dalonc da chela che de zenza ne vegn metù dant ogne dì. Vèlch fiza, vèlch an de più, eies segnè dal temp ma che i à trop da contèr, chest l’é chel che l’é ite te la operes che l’é stat fat.

L projet ne é stat metù dant te l’an de scola 2007/2008 e l’é stat metù a jir te doi pèrts: la pruma pèrt pervede a nosc “trasferiment” per vèlch ora en setemèna, con papières e lapijes, te Cèsa de Paussa per tor jù la jent de età. Dò aer fat i aboc a na vida piutost spedienta (ence percheche chisc veiac no aea na gran pazienza!) sion vegnui de retorn te scola e col didament de vèlch foto che ge era stat fat ai veiac, li aon comedé fora, se emprevalan de tecniches grafiches desvalives: lapisc, biro, lapisc checen, ciarbon, tusc, color a èga e auter.


Cò aon fenì de fèr i retrac sion peé via co la seconda pèrt che pervede a lurèr fora i studies grafics per dapò i durèr per meter en esser la operes pitoriches con n tai n muie personèl e artistich. Se emprevalan di desseignes aon

realisà la operes duran tecniches classiches desche tempera, acrilich, elech dessema a materièi neves e fora de anter desche spech, papier de sfoes, aluminium e c.i. su suporc desvalives (tulins de legn, teila, sach, carton, plexiglas e ghips).

La mostra met dant i retrac, touc jù dal vif, de la jent de età, vèlch particulèr del mus tratà o tout fora dai retrac, la sperimentazions pitoriches desche operes e na lingia de fotografies di momenc de lurier.

De gra a la colaborazion de l’Union di Ladins de Fascia, de dezember del 2008, co la operes del projet, l’é stat fat l Calender Artistich a numer limità, che l’é stat prejentà a na vida ofiziala te la senta de la Cèsa de Paussa per Jent de Età a Vich.

Clas IV A de l’Istitut d’Èrt “G. Soraperra” de Poza: Baiocco Davide, Brugnone Francesca, Cigolla Veronica, Comelli Tommaso, Degasper Michele, Deluca Monica, Donati Luca, Grassier Braian, Lazzeri Alice, Morandini Ilaria, Murer Mattia, Sottsass Maria, Zanon Jenny, Zorzi Alessia, Zorzi Cristina e Zorzi Katrin, coi professores Lara Steffe e Claus Soraperra.



Un di desseignes fac dai studenc de la Scola d’èrt tel projet “Generezioni visavi.”